

教
行
信
證

2

特35

910

255

518

顯淨土真實信文類序

夫以獲得信樂發起自如來選擇願心開闡
真心顯彰從大聖矜哀善巧然末代道俗近
世宗師沈自性唯心貶淨土真證迷定散自
心昏金剛真信爰愚禿釋鸞信順諸佛如來
眞說披閱論家釋家宗義廣蒙三經光澤特
開一心華文且至疑問遂出明證誠念佛恩
深重不恥人倫哢言忻淨邦徒衆厭穢域庶

45. 4. 19

內交

類雖加取捨莫生毀謗矣

至心信樂之願

正定聚
機

顯淨土真實信文類三

愚禿親鸞集

謹按往相廻向有大信大信心者則是長生
不死之神方忻淨厭穢之妙術選擇廻向之
直心利他深廣之信樂金剛不壞之真心易
往無人之淨信心光攝護之一心希有最勝
之大信世間難信之捷徑證大涅槃之真因
極速圓融之白道真如一實之信海也斯心

卽是出於念佛往生之願。斯大願名。選擇本願亦名。本願三心之願。復名。至心信樂之願。亦可名。往相信心之願也。然常沒。凡愚流轉。群生無上妙果。不難成。眞實信樂實難獲。何以故。乃由如來加威力故。博因大悲廣慧力。故遇獲淨信者。是心不顛倒。是心不虛僞。是以極惡深重衆生。得大慶喜心。獲諸聖尊重愛也。至心信樂。本願。文大經言。設我得佛。十

方衆生。至心信樂。欲生我國。乃至十念。若不生者。不取正覺。唯除五逆。誹謗正法。無量壽如來會言。若我證得無上覺。時餘佛剎中。諸有情類。聞我名已。所有善根。心心迴向願生我國。乃至十念。若不生者。不取菩提。唯除造無間惡業。誹謗正法及諸聖人。本願成就。文經言。諸有衆生。聞其名號。信心歡喜。乃至一念。至心迴向願生彼國。卽得往生。住不

退轉唯除五逆誹謗正法^上無量壽如來會
言他方佛國所有有情聞無量壽如來名號
能發一念淨信歡喜愛樂所有善根廻向願
生無量壽國者隨願皆生得不退轉乃至無
上正等菩提除五無間誹謗正法及謗聖者
^上又言聞法能不忘見敬得大慶則我善親
友是故當發意^上又言如是等類大威德者
能生廣大佛法異門^上又言如來功德佛自

知唯有世尊能開示天龍夜叉所不及二乘
自絕於名言若諸有情當作佛行超普賢登
彼岸敷演一佛之功德時逾多劫不思議於
是中間身滅度佛之勝慧莫能量是故具足
於信聞及諸善友之攝受得聞如是深妙法
當獲重愛諸聖尊如來勝智徧虛空所說義
言唯佛悟是故博聞諸智士應信我教如實
言人趣之身得甚難如來出世遇亦難信慧

多時方乃獲是故修者應精進如是妙法已
聽聞常令諸佛而生喜出抄論註曰稱彼如來
名如彼如來光明智相如彼名義欲如實修
行相應故稱彼如來名者謂稱無礙光如來
名也如彼如來光明智相者佛光明是智慧
相也此光明照十方世界無有障礙能除十
方衆生無明黑闇非如日月珠光但破空穴
中闇也如彼名義欲如實修行相應者彼無

礙光如來名號能破衆生一切無明能滿衆
生一切志願然有稱名憶念而無明由存而
不滿所願者何者由不如實修行與名義不
相應故也云何爲不如實修行與名義不相
應謂不知如來是實相身是爲物身又有三
種不相應一者信心不淳若存若亡故二者
信心不一無決定故三者信心不相續餘念
間故此三句展轉相成以信心不淳故無決

定無決定故念不相續亦可念不相續故不
得決定信不得決定信故心不淳與此相違
名如實修行相應是故論主建言我一心_上
讚阿彌陀佛偈曰_{尙造也}諸聞阿彌陀德號信
心歡喜慶所聞乃暨一念至心者廻向願生
皆得往唯除五逆謗正法故我頂禮願往生
_上光明寺觀經義云言如意者有二種一者
如衆生意隨彼心念皆應度之二如彌陀之

意五眼圓照六通自在觀機可度者一念之
中無前無後身心等赴三輪開悟各益不同
也_上又云此五濁五苦等通六道受未有無
者常逼惱之若不受此苦者卽非凡數攝也
_{出抄}又云從何等爲三下至必生彼國已來正
明辨定三心以爲正因卽有其二一明世尊
隨機顯益意密難知非佛自問自徵無由得
解二明如來還自答前三心之數經云一者

至誠心至者真誠者實欲明一切衆生身口
意業所修解行必須真實心中作不得外現
賢善精進之相內懷虛假貪瞋邪偽奸詐百
端惡性難侵事同蛇蝎雖起三業名爲雜毒
之善亦名虛假之行不名真實業也若作如
此安心起行者縱使苦勵身心日夜十二時
急走急作如灸頭燃者衆名雜毒之善欲回
此雜毒之行求生彼佛淨土者此必不可也

何以故正由彼阿彌陀佛因中行菩薩行時
乃至一念一剎那三業所修皆是真實心中
作凡所施爲趣求亦皆真實又真實有二種
一者自利真實二者利他真實至乃不善三業
必須真實心中捨又若起善三業者必須真
實心中作不簡內外明闇皆須真實故名至
誠心二者深心言深心者卽是深信之心也
亦有二種一者決定深信自身現是罪惡生

死凡夫曠劫已來常沒常流轉無有出離之緣二者決定深信彼阿彌陀佛四十八願攝受衆生無疑無慮乘彼願力定得往生又決定深信釋迦佛說此觀經三福九品定散二善證讚彼佛依正二報使人忻慕又決定深信彌陀經中十方恆沙諸佛證勸一切凡夫決定得生又深信者仰願一切行者等一心唯信佛語不顧身命決定依行佛遣捨者卽

捨佛遣行者卽行佛遣去處卽去是名隨順佛教隨順佛意是名隨順佛願是名眞佛弟子又一切行者但能依此經深信行者必不悞衆生也何以故佛是滿足大悲人故實語故除佛已還智行未滿在其學地由有正習二障未除果願未圓此等凡聖縱使測量諸佛教意未能決了雖有平章要須請佛證爲定也若稱佛意卽印可言如是如是若不可

佛意者卽言汝等所說是義不如是不印者卽同無記無利無益之語佛印可者卽隨順佛之正教若佛所有言說卽是正教正義正行正解正業正智若多若少衆不問菩薩人天等定其是非也若佛所說卽是了教菩薩等說盡名不了教也應知是故今時仰勸一切有緣往生人等唯可深信佛語專注奉行不可信用菩薩等不相應教以爲疑礙抱惑

自迷廢失往生之大益也至乃釋迦指勸一切凡夫盡此一身專念專修捨命已後定生彼國者卽十方諸佛悉皆同讚同勸同證何以故同體大悲故一佛所化卽是一切佛化一切佛化卽是一佛所化卽彌陀經中說釋迦讚嘆極樂種種莊嚴又勸一切凡夫一日七日一心專念彌陀名號定得往生次下文云十方各有恆河沙等諸佛同讚釋迦能於五

濁惡時惡世界惡衆生惡見惡煩惱惡邪無
信盛時指讚彌陀名號勸勵衆生稱念必得
往生卽其證也又十方佛等恐畏衆生不信
釋迦一佛所說卽共同心同時各出舌相徧
覆三千世界說誠實言汝等衆生皆應信是
釋迦所說所讚所證一切凡夫不問罪福多
少時節久近但能上盡百年下至一日七日
一心專念彌陀名號定得往生必無疑也是

故一佛所說卽一切佛同證誠其事也此名
就人立信也至乃又就此正中復有二種一者
一心專念彌陀名號行住坐臥不問時節久
近念念不捨者是名正定之業順彼佛願故
若依禮誦等卽名爲助業除此正助二行已
外自餘諸善悉名雜行至乃衆名疎雜之行也
故名深心三者廻向發願心至乃又廻向發願
生者必須決定眞實心中廻向願作得生想

此心深信由若金剛不爲一切異見異學別解別行人等之所動亂破壞唯是決定一心捉正直進不得聞彼人語卽有進退心生怯弱廻顧落道卽失往生之大益也問曰若有解行不同邪雜人等來相惑亂或說種種疑難導不得往生或云汝等衆生曠劫已來及以今生身口意業於一切凡聖身上具造十惡五逆四重謗法闡提破戒破見等罪未能

除盡然此等之罪繫屬三界惡道云何一生修福念佛卽入彼無漏無生之國永得證悟不退位也答曰諸佛教行數越塵沙稟識機緣隨情非一譬如世間人眼可見可信者如明能破闇空能含有地能載養水能生潤火能成壞如此等事悉名待對之法卽目可見千差萬別何況佛法不思議之力豈無種種益也隨出一門者卽出一煩惱門也隨入一

門者卽入一解脫智慧門也爲此隨緣起行各求解脫汝何以乃將非有緣之要行障惑於我然我之所愛卽是我有緣之行卽非汝所求汝之所愛卽是汝有緣之行亦非我所求是故各隨所樂而修其行者必疾得解脫也行者當知若欲學解從凡至聖乃至佛果一切無礙皆得學也若欲學行者必籍有緣之法少用功勞多得益也又白一切往生人

等今更爲行者說一譬喻守護信心以防外邪異見之難何者是也譬如有人欲向西行百千之里忽然中路有二河一是火河在南二是水河在北二河各闊百步各深無底南北無邊正水火中間有一白道可濶四五寸許此道從東岸至西岸亦長百步其水波浪交過濕道其火焰亦來燒道水火相交常無休息此人既至空曠迴處更無人物多有群

賊惡獸見此人單獨競來欲殺此人怖死直
走向西忽然見此大河卽自念言此河南北
不見邊畔中間見一白道極是狹少二岸相
去雖近何由可行今日定死不疑正欲到回
群賊惡獸漸漸來逼正欲南北避走惡獸毒
虫競來向我正欲向西尋道而去復恐墮此
水火二河當時惶怖不復可言卽自思念我
今回亦死住亦死去亦死一種不免死者我

寧尋此道向前而去既有此道必應可度作
此念時東岸忽聞人勸聲仁者但決定尋此
道行必無死難若住卽死又西岸上有人喚
言汝一心正念直來我能護汝衆不畏墮於
水火之難此人旣聞此遣彼喚卽自正當身
心決定尋道直進不生疑怯退心或行一分
二分東岸群賊等喚言仁者回來此道嶮惡
不得過必死不疑我等衆無惡心相向此人

雖聞喚聲亦不回顧一心直進念道而行須臾卽到西岸永離諸難善友相見慶樂無已此是喻也次合喻者言東岸者卽喻此娑婆之火宅也言西岸者卽喻極樂寶國也言群賊惡獸詐親者卽喻衆生六根六識六塵五陰四大也言無人空迴澤者卽喻常隨惡友不值眞善知識也言水火二河者卽喻衆生貪愛如水瞋憎如火也言中間白道四五寸

者卽喻衆生貪瞋煩惱中能生清淨願往生心也乃由貪瞋強故卽喻如水火善心微故喻如白道又水波常濕道者卽喻愛心常起能染汙善心也又火焰常燒道者卽喻瞋嫌之心能燒功德之法財也言人行道上直向西者卽喻廻諸行業直向西方也言東岸聞人聲勸遣尋道直西進者卽喻釋迦已滅後人不見由有教法可尋卽喻之如聲也言或

行一分二分群賊等喚回者卽喻別解別行
惡見人等妄說見解迭相惑亂及自造罪退
失也言西岸上有人喚者卽喻彌陀願意也
言須臾到西岸善友相見喜者卽喻衆生久
沈生死曠劫輪回迷倒自纏無由解脫仰蒙
釋迦發遣指向西方又籍彌陀悲心招喚今
信順二尊之意不顧水火二河念念無遺乘
彼願力之道捨命已後得生彼國與佛相見

慶喜何極也又一切行者行住坐臥三業所
修無間晝夜時節常作此解常作此想故名
廻向發願心又言廻向者生彼國已還起大
悲廻入生死教化衆生亦名廻向也三心既
具無行不成願行既成若不生者無有是處
也又此三心亦通攝定善之義應知上已又云
敬白一切往生知識等大須慚愧釋迦如來
實是慈悲父母種種方便發起我等無上信

心_上 貞元新定釋教目錄卷第十一云集諸
經禮懺儀_{下上} 大唐西崇福寺沙門智昇撰也
准貞元十五年十月廿三日勅編入云云懺
儀上卷智昇依諸經造懺儀中依觀經引善
導禮懺日中時禮下卷者比丘善導集記云
云依彼懺儀鈔要文云二者深心卽是真實
信心信知自身是具足煩惱凡夫善根薄少
流轉三界不出火宅今信知彌陀本弘誓願

及稱名號下至十聲聞等定得往生及至一
念無有疑心故名深心_{至乃} 其有得聞彼彌陀
佛名號歡喜至一心皆當得生彼_{出抄} 往生要
集云入法界品言譬如有人得不可壞藥一
切怨敵不得其便菩薩摩訶薩亦復如是得
菩提心不可壞法藥一切煩惱諸魔怨敵所
不能壞譬如有人得住水寶珠瓔珞其身入
深水中而不沒溺得菩提心住水寶珠入生

死海而不沈沒譬如金剛於百千劫處於水中而不爛壞亦無異變菩提之心亦復如是於無量劫處生死中諸煩惱業不能斷滅亦無損滅_上又云我亦在彼攝取之中煩惱障眼雖不能見大悲無倦常照我身_上爾者若行若信無有一事非阿彌陀如來清淨願心之所廻向成就非無因他因有也可知問如來本願已發至心信樂欲生誓何以故

論主言一心也答愚鈍衆生解了爲令易彌陀如來雖發三心涅槃真因唯以信心是故論主合三爲一歟私闕三心字訓三卽合一其意何者言至心者至者卽是真也實也誠也心者卽是種也實也言信樂者信者卽是真也實也誠也滿也極也成也用也重也審也驗也宣也忠也樂者卽是欲也願也愛也悅也歡也喜也賀也慶也言欲生者欲者卽

是願也樂也覺也知也生者卽是成也作也
爲也興也明知至心卽是真實誠種之心故
疑蓋無雜也信樂卽是真實誠滿之心極成
用重之心審驗宣忠之心欲願愛悅之心歡
喜賀慶之心故疑蓋無雜也欲生卽是願樂
覺知之心成作爲興之心大悲廻向之心故
疑蓋無雜也今按三心字訓真實心而虛假
無雜正直心而邪僞無雜眞知疑蓋無間雜

故是名信樂信樂卽是一心也一心卽是眞
實信心是故論主建言一心也應知
又問如字訓論主意以三爲一義其理雖可
然爲愚惡衆生阿彌陀如來已發三心願云
何思念也答佛意難測雖然竊推斯心一切
群生海自從無始已來乃至今日至今時穢
惡汙染無清淨心虛假諂僞無眞實心是以
如來悲憫一切苦惱衆生海於不可思議兆

載永劫行菩薩行時三業所修一念一刹那無不清淨無不真心如來以清淨真心成就圓融無礙不可思議不可稱不可說至德以如來至心回施諸有一切煩惱惡業邪智群生海則是彰利他真心故疑蓋無雜斯至心則是至德尊號爲其體也是以大經言不生欲覺瞋覺害覺不起欲想瞋想害想不著色聲香味之法忍力成就不計衆苦少欲知足

無染患癡三昧常寂智慧無礙無有虛僞諂曲之心和顏愛語先意承問勇猛精進志願無倦專求清白之法以惠利群生恭敬三寶奉事師長以大莊嚴具足衆行令諸衆生功德成就無量壽如來會言佛告阿難彼法處比丘於世間自在王如來及諸天人魔梵沙門婆羅門等前廣發如是大弘誓皆已成就世間希有發是願已如實安住種種功德

具足莊嚴威德廣大清淨佛土修習如是菩薩行時經於無量無數不可思議無有等等億那由他百千劫內初未曾起貪瞋及癡欲害恚想不起色聲香味觸想於諸衆生常樂愛敬猶如親屬_{至乃}其性調順無有暴惡於諸有情常懷慈忍心不詐諂亦無懈怠善言策進求諸白法普爲群生勇猛無退利益世間大願圓滿_{出略}光明寺和尚云欲回此雜毒之

行求生彼佛淨土者此必不可也何以故正由彼阿彌陀佛因中行菩薩行時乃至一念一剎那三業所修皆是真實心中作凡所施爲趣求亦皆真實又真實有二種一者自利真實二者利他真實_{至乃}不善三業必須真實心中捨又若起善三業者必須真實心中作不簡內外明闇皆須真實故名至誠心_{要抄}爾者大聖真言宗師釋義信知斯心則是不可

思議不可稱不可說一乘大智願海廻向利
益他之真實心是名至心既言真實言真實
者涅槃經言實諦者一道清淨無有二也言
真實者卽是如來如來者卽是真實真實者
卽是虛空虛空者卽是真實真實者卽是佛
性佛性者卽是真實上釋云不簡內外明闇
內外者內者卽是出世外者卽是世間明闇
者明者卽是出世闇者卽是世間又復明者

卽智明闇者卽無明也涅槃經言闇卽世間
明卽出世闇卽無明明卽智明上次言信樂
者則是如來滿足大悲圓融無礙信心海是
故疑蓋無有間雜故名信樂卽以利他廻向
之至心爲信樂體也然從無始已來一切群
生海流轉無明海沈迷諸有輪繫縛衆苦輪
無清淨信樂法爾無真實信樂是以無上功
德難上值遇最勝淨信難上獲得一切凡小

一切時中貪愛之心常能汗善心瞋憎之心常能燒法財急作急修如灸頭燃衆名雜毒雜修之善亦名虛假諂僞之行不名真實業也以此虛假雜毒之善欲生無量光明土此必不可也何以故正由如來行菩薩行時三業所修乃至一念一刹那疑蓋無雜斯心者卽如來大悲心故必成報土正定之因如來悲憐苦惱群生海以無礙廣大淨信廻施諸

有海是名利他真實信心本願信心願成就文經言諸有衆生聞其名號信心歡喜乃至一念也又言他方佛國所有有情聞無量壽如來名號能發一念淨信歡喜也涅槃經言善男子大慈大悲名爲佛性何以故大慈大悲常隨菩薩如影隨形一切衆生畢定當得大慈大悲是故說言一切衆生悉有佛性大慈大悲者名爲佛性佛性者名爲如來大喜

大捨名爲佛性何以故菩薩摩訶薩若不能捨二十五有則不能得阿耨多羅三藐三菩提以諸衆生畢當得故是故說言一切衆生悉有佛性大喜大捨者卽是佛性佛性者卽是如來佛性者名大信心何以故以信心故以菩薩摩訶薩則能具足檀波羅蜜乃至般若波羅蜜一切衆生畢定當得大信心故是故說言一切衆生悉有佛性大信心者卽是

佛性佛性者卽是如來佛性者名一子地何以故以一子地因緣故菩薩則於一切衆生得平等心一切衆生畢定當得一子地故是故說言一切衆生悉有佛性一子地者卽是佛性佛性者卽是如來又言或說阿耨多羅三藐三菩提信心爲因是菩提因雖復無量若說信心則已攝盡又言信復有二種一從聞生二從思生是人信心從聞而生不

從思生是故名爲信不具足復有二種一信
有道二信得者是人信心唯信有道都不信
有得道之人是名爲信不具足抄出華嚴經
言聞此法歡喜信心無疑者速成無上道與
諸如來等又言如來能永斷一切衆生疑隨
其心所樂普皆令滿足又言信爲道元功德
母長養一切諸善法斷除疑網出愛流開示
涅槃無上道信無垢濁心清淨滅除憍慢恭

敬本亦爲法藏第一財爲清淨手受衆行信
能惠施心無恚信能歡喜入佛法信能增長
智功德信能必到如來地信令諸根淨明利
信力堅固無能壞信能永滅煩惱本信能專
向佛功德信於境界無所著遠離諸難得無
難信能超出衆魔路示現無上解脫道信爲
功德不壞種信能生長菩提樹信能增益最
勝智信能示現一切佛是故依行說次第信

樂最勝甚難得_{至乃}若常信奉於諸佛則能興集大供養若能興集大供養彼人信佛不思議若常信奉於尊法則聞佛法無厭足若聞佛法無厭足彼人信法不思議若常信奉清淨僧則得信心不退轉若得信心不退轉彼人信力無能動若得信力無能動則得諸根淨明利若得諸根淨明利則得親近善知識若能親近善知識則能修習廣大善若能修

習廣大善彼人成就大因力若人成就大因力則得殊勝決定解若得殊勝決定解則爲諸佛所護念若爲諸佛所護念則能發起菩提心若能發起菩提心則能勤修佛功德若能勤修佛功德則得生在如來家若得生在如來家則善修行巧方便若善修行巧方便則得信樂心清淨若得信樂心清淨則得增上最勝心若得增上最勝心則常修習波羅

蜜若常修習波羅蜜則能具足摩訶衍若能具足摩訶衍則能如法供養佛若能如法供養佛則能念佛心不動若能念佛心不動則常覩見無量佛若常覩見無量佛則見如來體常住若見如來體常住則能知法永不滅若能知法永不滅則得辯才無障礙若得辯才無障礙則能開演無邊法若能開演無邊法則能慈愍度衆生若能慈愍度衆生則得

堅固大悲心若得堅固大悲心則能愛樂甚深法若能愛樂甚深法則能捨離有爲過若能捨離有爲過則離憍慢及放逸若離憍慢及放逸則能兼利一切衆若能兼利一切衆則處生死無疲厭抄略論註曰名如實修行相應是故論主建言我一心上已又言經始稱如是彰信爲能入上已次言欲生者則是如來招喚諸有群生之勅命卽以真實信樂爲欲生

體也誠是非大小凡聖定散自力之廻向故名不廻向也然微塵界有情流轉煩惱海漂沒生死海無真實廻向心無清淨廻向心是故如來矜哀一切苦惱群生海行菩薩行時三業所修乃至一念一刹那廻向心爲首得成就大悲心故以利他真實欲生心廻施諸有海欲生卽是廻向心斯則大悲心故疑蓋無雜是以本願欲生心成就文經言至心廻

向願生彼國卽得往生住不退轉唯除五逆誹謗正法上巳又言愛樂所有善根廻向願生無量壽國者隨願皆生得不退轉乃至無上正等菩提除五無間誹謗正法及謗聖者上巳淨土論曰云何廻向不捨一切苦惱衆生心常作願廻向爲首得成就大悲心故廻向有二種相一者往相二者還相往相者以已功德廻施一切衆生作願共往生彼阿彌陀如

來安樂淨土還相者生彼土已得奢摩他毘婆舍那方便力成就廻入生死稠林教化一切衆生共向佛道若往若還皆爲拔衆生渡生死海是故言廻向爲首得成就大悲心故上又云淨入願心者論曰又向說觀察莊嚴佛土功德成就莊嚴佛功德成就莊嚴菩薩功德成就此三種成就願心莊嚴應知應知者應知此三種莊嚴成就由本四十八願等

清淨願心之所莊嚴因淨故果淨非無因他因有也上又論曰出第五門者以大慈悲觀察一切苦惱衆生示應化身廻入生死園煩惱林中遊戲神通至教化地以本願力廻向故是名出第五門上光明寺和尚云又廻向發願生者必須決定真實心中廻向願作得生想此心深信由若金剛不爲一切異見異學別解別行人等之所動亂破壞唯是決定

一心捉正直進，不得聞彼人語，卽有進退，心生怯弱，廻顧落道，卽失往生之大益也。比眞知二河譬喻，中言白道四五寸者，白道者白之言，對黑也；白者卽是選擇攝取之白業，往相廻向之淨業也；黑者卽是無明煩惱之黑業，二乘人天之雜善也。道之言對路，道者卽是本願一實之直道，大般涅槃無上之大道也；路者卽是二乘三乘萬善諸行之小路也。

言四五寸者，喻衆生四大五陰也。言能生清淨願心者，獲得金剛眞心也。本願力廻向大信心海，故不可破壞，喻之如金剛也。觀經義云：道俗時衆等各發無上心，生死甚難，厭佛法復難，忻共發金剛志，橫超斷四流，正受金剛心，相應一念，後果得涅槃者。又云：眞心徹到厭苦，娑婆忻樂無爲，永歸常樂，但無爲之境，不可輕爾，卽階苦惱，娑婆無由輒然得。

離自非發金剛之志永絕生死之元若不親
從慈尊何能免斯長歎又云言金剛者卽是
無漏之體也信知至心信樂欲生其言雖
異其意惟一何以故三心已疑蓋無雜故真
實一心是名金剛真心金剛真心是名真實
信心真實信心必具名號名號必不具願力
信心也是故論主建言我一心又言如彼名
義欲如實修行相應故凡按大信海者不簡

貴賤縑素不謂男女老少不問造罪多少不
論修行久近非行非善非頓非漸非定非散
非正觀非邪觀非有念非無念非尋常非臨
終非多念非一念唯是不可思議不可稱不
可說信樂也喻如阿伽陀藥能滅一切毒如
來誓願藥能滅智愚毒也然就菩提心有二
種一者豎二者橫又就豎復有二種一者豎
超二者豎出豎超豎出明權實顯密大小之

教歷劫迂迴之菩提心自力金剛心菩薩大
心也亦就橫復有二種一者橫超二者橫出
橫出者正雜定散他力中之自力菩提心也
橫超者斯乃願力迴向之信樂是曰願作佛
心願作佛心卽是橫大菩提心是名橫超金
剛心也橫豎菩提心其言一而其心雖異入
眞爲正要眞心爲根本邪雜爲錯疑情爲失
也忻求淨刹道俗深了知信不具足之金言

永應離聞不具足之邪心也論註曰按王舍
城所說無量壽經三輩生中雖行有優劣莫
不發皆無上菩提心此無上菩提心卽是願
作佛心願作佛心卽是度衆生心度衆生心
卽是攝取衆生ハカヘテモクシヤクナク生有佛國土心是故願生彼
安樂淨土者カラス要發無上菩提心也若人不發
無上菩提心但聞彼國土受樂無間爲樂故
願生亦當不得往生也是故言不求自身住

持之樂欲拔一切衆生苦故住持樂者謂彼安樂淨土爲阿彌陀如來本願力之所住持受樂無間也凡釋迴向名義謂以已所集一切功德施與一切衆生共向佛道元照律師云他不能爲故甚難舉世未見故希有又云念佛法門不簡愚智豪賤不論久近善惡唯取決誓猛信臨終惡相十念往生此乃具縛凡愚屠沽下類刹那超越成佛之法可謂

世間甚難信也又云於此惡世修行成佛爲難也爲諸衆生說此法門爲二難也承前二難則彰諸佛所讚不虛意使衆生聞而信受上律宗用欽云說法難中良以此法轉凡成聖猶反掌乎大爲容易故凡淺衆生多生疑惑卽大本云易往而無人故知難信矣聞持記云不簡愚智利性有鈍有不擇豪賤強報有弱有不論久近淺功深有不選善惡好行有醜有取決誓猛信臨終惡

相即觀經下品中生地獄衆火一時俱至等具縛凡愚二惑全在故屠沽下類刹

那超越成佛之法可謂一切世間甚難信也

屠謂宰殺沽即沽賣如此惡人止由十念便得超往豈非難信

阿彌陀如來號真實明平

等覺難思議畢竟依大應供大安慰無等等

不可思議光上已樂邦文類後序曰修淨土者

常多得其門而徑造者無幾論淨土者常多

得其要而直指者或寡矣曾未聞有以自障

自蔽為說者因得以言之夫自障莫若愛自

蔽莫若疑但使疑愛二心了無障礙則淨土
一門未始間隔彌陀洪願常自攝持必然之
理也上已

夫按真實信樂信樂有一念一念者斯顯信
樂開發時尅之極促彰廣大難思慶心也是
以大經言諸有衆生聞其名號信心歡喜乃
至一念至心廻向願生彼國即得往生住不
退轉又言他方佛國所有衆生聞無量壽如

來名號能發一念淨信歡喜又言其佛本願力聞名欲往生又言聞佛聖德名也涅槃經言云何名為聞不具足如來所說十二部經唯信六部未信六部是故名為聞不具足雖復受持是六部經不能讀誦為他解說無所利益是故名為聞不具足又復受是六部經已為論議故為勝他故為利養故為諸有故持讀誦說是故名為聞不具足也光明寺和

尚云一心專念又云專心專念也然經言聞者衆生聞佛願生起本末無有疑心是日聞也言信心者則本願力廻向之信心也言歡喜者形身心悅豫之貌也言乃至者攝多少之言也言一念者信心無二心故曰一念是名一心一心則清淨報土真因也獲得金剛真心者橫超五趣八難道必獲現生十種益何者為十一者冥衆護持益二者至德具足

益三者轉惡成善，益四者諸佛護念，益五者諸佛稱讚，益六者心光常護，益七者心多歡喜，益八者知恩報德，益九者常行大悲，益十者入正定聚，益也。宗師云：專念卽是一行，云：專心卽是一心也。然者願成就一念卽是專心，專心卽是深心，深心卽是深信，深信卽是堅固深信，堅固深信卽是決定心，決定心卽是無上上心，無上上心卽是真心，真心卽是

相續心，相續心卽是淳心，淳心卽是憶念，憶念卽是真實一心，真實一心卽是大慶喜心，大慶喜心卽是真實信心，真實信心卽是金剛心，金剛心卽是願作佛心，願作佛心卽是度衆生心，度衆生心卽是攝取衆生，生安樂淨土心，是心卽是大菩提心，是心卽是大慈悲心，是心卽是由無量光明慧生故，願海平等故，發心等發心等，故道等道等，故大慈悲

等。大慈悲者是佛道，正因故論。註曰：願生彼安樂淨土者，要發無上菩提心也。又云：是心作佛者，言心能作佛也。是心是佛者，心外無佛也。譬如火從木出，火不得離木也。以不離木故，則能燒木。木爲火燒，木卽爲火也。光明云是心作佛，是心是佛，是心外無異佛也。故知一心是名如實修行相應，卽是正教。是正義，是正行，是正解，是正業，是正智也。三心卽

一心，一心卽金剛真心之義。答竟可知。止觀一云：菩提者天竺語，此稱道質多者天竺音。此方云心，心者卽慮知也。言橫超斷四流者，橫超者橫者對豎，超豎出。超者對迂，對廻之言。豎超者大乘真實之教也。豎出者大乘權方便之教。二乘三乘迂廻之教也。橫超者卽願成就一實圓滿之真教。真宗是也。亦復有橫出卽三輩九品定散之教化。土懈慢迂

廻之善也大願清淨報土不云品位階次一念須臾頃速疾超證無上正眞道故曰橫超也大本言超發無上殊勝之願又言我建超世願必至無上道名聲超十方究竟靡所聞誓不成正覺又言必得超絕去往生安養國橫截五惡趣惡趣自然閉昇道無窮極易往而無人其國不逆違自然之所牽上巳大阿彌陀經言支謙三藏譯也可得超絕去往生阿彌陀佛國

橫截於五惡道自然閉塞昇道之無極易往無有人其國土不逆違自然之隨牽上巳言斷者發起往相一心故無生而當受生無趣而更應到趣已六趣四生因亡果滅故卽頓斷絕三有生死故曰斷也四流者則四暴流又生老病死也大本言會當成佛道廣度生死流又言會當作世尊將度一切生老死上巳涅槃經言又涅槃者名爲洲渚何以故四大暴

河不能漂故何等爲四一者欲暴二者有暴
三者見暴四無明暴是故涅槃名爲洲渚上巳
光明師云白諸行者凡夫生死不可貪而不
厭彌陀淨土不可輕而不忻厭則娑婆永隔
忻則淨土常居隔則六道因亡輪迴之果自
滅因果既亡則形名頓絕也又云仰願一切
往生人等善自思量己能今身願生彼國者
行住坐臥必須勵心尅己晝夜莫廢畢命爲

期上在一形似如少苦前念命終後念卽生
彼國長時永劫常受無爲法樂乃至成佛不
逕生死豈非快哉應知上巳言眞佛弟子者眞
言對僞對假也弟子者釋迦諸佛之弟子金
剛心行人也由斯信行必可超證大涅槃故
曰眞佛弟子大本言設我得佛十方無量不
可思議諸佛世界衆生之類蒙我光明觸其
身者身心柔軟超過人天若不爾者不取正

覺設我得佛，十方無量不可思議諸佛世界，
衆生之類聞我名字，不得菩薩無生法忍，諸
深摠持者，不取正覺，無量壽如來會言，若我
成佛，周徧十方無量無邊不可思議無等界，
衆生之輩蒙佛威光所照觸者，身心安樂，超
過人天，若不爾者，不取菩提。又言：聞法能
不忘見敬，得大慶則我善親友。又言：其有至
心願生安樂國者，可得智慧明達，功德殊勝。

又言：廣大勝解者，又言：如是等類大威德者，
能生廣大異門。又言：若念佛者，當知此人，是
人中分陀利華。安樂集云：據諸部大乘明
說聽方軌者，大集經云：於說法者，作醫王想，
作拔苦想，所說之法，作甘露想，作醍醐想，其
聽法者，作增長勝解想，作愈病想，若能如是
說者，聽者皆堪紹隆佛法，常生佛前。依涅槃
經佛言：若人但能至心常修念佛三昧者，

十方諸佛恒見此人如現在前是故涅槃經云佛告迦葉菩薩若有善男子善女人常能至心專念佛者若在山林若在聚落若晝若夜若坐若臥諸佛世尊常見此人如現目前恒與此人而作受施至乃依大智度論有三番解釋第一佛是無上法王菩薩爲法臣所尊所重唯佛世尊是故應當常念佛也第二有諸菩薩自云我從曠劫已來得蒙世尊長養

我等法身智身大慈悲身禪定智慧無量行願由佛得成爲報恩故常願近佛亦如大臣蒙王恩寵常念其王第三有諸菩薩復作是言我於因地遇惡知識誹謗波若墮於惡道逕無量劫雖修餘行未能出後於一時依善知識邊教我行念佛三昧其時卽能併遣諸障方得解脫有斯大益故願不離佛至乃大經云凡欲往生淨土要須發菩提心爲源云何

菩提者乃是無上佛道之名也若欲發心作佛者此心廣大周徧法界此心長遠盡未來際此心普備離二乘障若能一發心傾無始生死有輪至乃大悲經云云何名爲大悲若專念佛相續不斷者隨其命終定生安樂若能展轉相勸行念佛者此等悉名行大悲人上巳
出抄光明師云唯恨衆生疑不疑淨土對面不相忤莫論彌陀攝不攝意在專心廻不廻至乃

或導從今至佛果長劫讚佛報慈恩不蒙彌陀弘誓力何時何劫出娑婆至乃何期今日至寶國實是娑婆本師力若非本師知識勸彌陀淨土云何入又云佛世甚難值人有信慧難遇聞希有法斯復最爲難自信教人信難中轉更難大悲弘普化眞成報佛恩又云彌陀身色如金山相好光明照十方唯有念佛蒙光攝當知本願最爲強十方如來舒舌證

專稱名號，至西方到彼華臺，聞妙法，十地願行自然彰。又云：但有專念阿彌陀佛，衆生彼佛心，光常照是人，攝護不捨，總不論照攝餘雜業行者，此亦是現生護念增上緣。又云：言心歡喜得忍者，此明阿彌陀佛國清淨光明，忽現眼前，何勝踊躍。因茲喜故，卽得無生之忍，亦名喜忍，亦名悟忍，亦名信忍，此乃玄談未標得處，欲令夫人等，憺心此益，勇猛專

精心想見時，方應悟忍，此多是十信中忍，非解行已上忍也。又云：從若念佛者，下至生諸佛家，已來正顯念佛三昧功能超絕，實非雜善得爲比類。卽有其五一明專念彌陀佛名，二明指讚能念之人，三明若能相續念佛者，此人甚爲希有，更無物可以方之。故引芬陀利爲喻，言芬陀利者，名人中好華，亦名希有華，亦名人中上上華，亦名人中妙好華，此華

相傳名蔡華，是若念佛者，卽是人中好人，人中妙好人，人中上上人，人中希有人，人中最勝人也。四明專念彌陀名者，卽觀音勢至常隨，影護亦如親友知識也。五明今生旣蒙此益，捨命卽入諸佛之家，卽淨土是也。到彼長時聞法，歷事供養，因圓果滿，道場之座，豈賒上巳王日休云：我聞無量壽經，衆生聞是佛名，信心歡喜，乃至一念願生彼國，卽得往生，住

不退轉，不退轉者，梵語謂之阿惟越致。法華經謂彌勒菩薩所得報地也。一念往生，便同彌勒佛語不虛。此經寔往生之徑術，脫苦之神方，應皆信受。上巳大經言：佛告彌勒於此世界有六十七億不退菩薩往生彼國。一一菩薩已曾供養無數諸佛，次如彌勒。又言：佛告彌勒，此佛土中有七十二億菩薩，彼於無量億那由他百千佛所種諸善根，成不退轉，當

生彼國_{出妙}律宗用欽師云至如華嚴極唱法
華妙談且未見有普授衆生一生皆得阿耨
多羅三藐三菩提記者誠所謂不可思議功
德之利也_上真知彌勒大士窮等覺金剛心
故龍華三會之曉當極無上覺位念佛衆生
窮橫超金剛心故臨終一念之夕超證大般
涅槃故曰便同也加之獲金剛心者則與韋
提等即可獲得喜悟信之忍是則往相廻向

之真心徹到故籍不可思議之本誓故也禪
宗智覺讚念佛行者云奇哉佛力難思古今
未有律宗元照師云嗚呼明教觀孰如智者
乎臨終舉觀經讚淨土而長逝矣達法界孰
如杜順乎勸四衆念佛陀感勝相而西邁矣
參禪見性孰如高玉智覺乎皆結社念佛而
俱登上品矣業儒有才孰如劉雷柳子厚白
樂天乎然皆秉筆書誠而願生彼土矣_上言

假者卽是聖道諸機淨土定散機也故光明師云佛教多門八萬四正爲衆生機不同又云方便假門等無殊又云門門不同名漸教萬劫苦行證無生上言僞者則六十二見九十五種之邪道是也涅槃經言世尊常說一切外學九十五種皆趣惡道上光明師云九十五種皆汙世唯佛一道獨清閑上誠知悲哉愚禿沈沒於愛欲廣海迷惑於名利大山

不喜入定聚之數不快近真證之證可耻可傷矣夫佛說難治機涅槃經言迦葉世有三上人其病難治一謗大乘二五逆罪三一闡提如是三病世中極重悉非聲聞緣覺菩薩之所能治善男子譬如有病必死無治若有瞻病隨意醫藥若無瞻病隨意醫藥如是之病定不可治當知是人必死不疑善男子是三種人亦復如是從佛菩薩得聞法已卽便能

發阿耨多羅三藐三菩提心，若有聲聞緣覺菩薩，或有說法，或不說法，不能令其發阿耨多羅三藐三菩提心。又言爾時王舍大城阿闍世王，其性弊惡，喜行殺戮，具口四惡，貪恚愚癡，其心熾盛，而為眷屬，貪著現世五欲樂，故父王無辜，橫加逆害，因害父已，心生悔熱，心悔熱，故徧體生瘡，其瘡臭穢，不可附近。尋自念言：我今此身已受華報地獄果。

報將近，不遠。爾時其母韋提希后，以種種藥而為塗之，其瘡遂增，無有降損。王即白母：如是瘡者，從心而生，非四大起。若言衆生有能治者，無有是處。時有大臣名曰月稱，往至王所，在一面立，白言：大王何故愁悴，顏容不悅，為身痛邪？為心痛乎？王答臣言：我今身心豈得不痛？我父無辜，橫加逆害，我從智者曾聞，是義世有五人不脫地獄，謂五逆罪。我今已

有無量無邊阿僧祇罪云何身心而得不痛
又無良醫治我身心臣言大王莫大愁苦卽
說偈言若常愁苦愁遂增長如人喜眠眠則
滋多貪嬌嗜酒亦復如是如王所言世有五
人不脫地獄誰往見之來語王邪言地獄者
直是世間多智者說如王所言世無良醫治
身心者今有大醫名富闌那一切知見得自
在定畢竟修習清淨梵行常爲無量無邊衆

生演說無上涅槃之道爲諸弟子說如是法
無有黑業無黑業報無有白業無白業報無
黑白業無黑白業報無有上業及以下業是
師今在王舍城中惟願大王屈駕往彼可令
是師療治身心時王答言審能如是滅除我
罪我當歸依復有一臣名曰藏德復往王所
而作是言大王何故面貌憔悴唇口乾焦音
聲微細至乃何所苦爲身痛邪爲心痛乎王卽

答言我今身心云何不痛我之癡盲無有慧目近諸惡友而爲親善隨提婆達惡人之言正法之王橫加逆害我昔曾聞智人偈說若於父母佛及弟子生不善心起於惡業如是果報在阿鼻獄以是事故令我心怖生大苦惱又無良醫而見救療大臣復言惟願大王且莫愁怖法有二種一者出家二者王法王法者謂害其父則王國土雖云是逆實無有

罪如迦羅羅虫要壞母腹然後乃生生法如是雖破母身實亦無罪驪懷妊等亦復如是治國之法法應如是雖殺父兄亦無有罪出家法者乃至蚊蟻殺亦有罪至乃如王所言世無良醫治身心者今有大師名末伽梨物舍梨子一切知見憐愍衆生猶如赤子已離煩惱能拔衆生三毒利箭至乃是師今在王舍大城惟願大王往至其所王若見者衆罪消滅

時王答言審能如是除滅我罪我當歸依復
有一臣名曰實德復到王所卽說偈言大王
何故身脫瓔珞首髮蓬亂乃至如是乃爲是
心痛邪爲身痛邪王卽答言我今身心豈得
不痛我父先王慈愛仁惻特見矜念實無過
咎往問相師相師答言是兒生已定當害父
雖聞是語猶見瞻養曾聞智者作如是言若
人通母汗比丘尼偷僧祇物殺發無上菩提

心人及殺其父如是之人必定當墮阿鼻地
獄我今身心豈得不痛大臣復言惟願大王
且莫愁苦至乃一切衆生皆有餘業以業緣故
數數受生死若使先王有餘業者王今殺之
竟有何罪惟願大王寬意莫愁何以故若常
愁苦愁遂增長如人喜眠眠則滋多貪嬌嗜
酒亦復如是至乃刪闍耶毗羅胝子復有一臣
名悉知義卽至王所作如是言至乃王卽答言

我今身心豈得無痛_{至乃}先王無辜橫興逆害，
我亦曾聞智者說言，若有害父，當於無量阿
僧祇劫受大苦惱。我今不久必墮地獄，又無
良醫救療我罪。大臣卽言：惟願大王放捨愁
苦，王不聞耶？昔者有王名曰羅摩，害其父，已
得紹王位，跋提大王毗樓眞王那睺沙王迦
帝迦王毘舍佉王月光明王日光明王愛王
持多人王如是等，王皆害其父，得紹王位，然

無一王入地獄者。於今現在毗瑠璃王優陀
耶王惡性王鼠王蓮華王如是等，王皆害其
父，悉無一王生愁惱者。雖言地獄餓鬼天中
誰有見者？大王唯有二，有一者人道二者畜
生。雖有是二，非因緣生，非因緣死。若非因緣
何有善惡？惟願大王勿懷愁怖，何以故？若常
愁苦，愁遂增長，如人喜眠，眠則滋多，貪嬌嗜
酒，亦復如是_{至乃}阿耨多翅舍欽婆羅_{至乃}復有

大臣名曰吉德_{至乃}言地獄者爲有何義臣當說之地者名地獄者名破破於地獄無有罪報是名地獄又復地者名人獄者名天以害其父故到人天以是義故婆蘇仙人唱言殺羊得人天樂是名地獄又復地者名命獄者名長以殺生故得壽命長故名地獄大王是故當知實無地獄大王如種麥得麥種稻得稻殺地獄者還得地獄殺害於人應還得人

大王今當聽臣所說實無殺害若有我者實亦無害若無我者復無所害何以故若有我者常無變易以常住故不可殺害不破不壞不繫不縛不瞋不喜猶如虛空云何當有殺害之罪若無我者諸法無常以無常故念念壞滅念念滅故殺者死者皆念念滅若念念滅誰當有罪大王如火燒木火則無罪如斧斫樹斧亦無罪如鎌刈草鎌實無罪如刀殺

人刀實非人刀既無罪人云何罪如毒殺人
毒實非人毒藥非罪人云何罪一切萬物皆
亦如是實無殺害云何有罪惟願大王莫生
愁苦何以故若常愁苦愁遂增長如人喜眠
眠則滋多貪嬌嗜酒亦復如是今有大師名
迦羅鳩駄迦旃延至乃復有一臣名無所畏至乃
今有大師名尼乾陀若提子至乃爾時大醫名
曰耆婆往至王所白言大王得安眠不王以

偈答言至乃耆婆我今病重於正法王興惡逆
害一切良醫妙藥呪術善巧瞻病所不能治
何以故我父先王如法治國實無辜咎橫加
逆害如魚處陸至乃我昔曾聞智者說言身口
意業若不清淨當知是人必墮地獄我亦如
是云何當得安穩眠耶今我又無無上大醫
演說法藥除我病苦耆婆答言善哉善哉王
雖作罪心生重悔而懷慙愧大王諸佛世尊

常說。是言。有二。白法能救衆生。一慙。二愧。慙者。自不作罪。愧者。不教他作。慙者。內自羞耻。愧者。發露。向人。慙者。羞人。愧者。羞天。是名。慙。愧。無慙。愧者。不名。爲人名。爲畜生。有慙。愧。故。則能恭敬。父母師長。有慙。愧。故。說有。父母兄弟姊妹。善哉。大王。具有慙。愧。如王所言。無能治者。大王當知。迦毘羅城。淨飯王。子。姓。瞿曇氏。字。悉達多。無師覺悟。自然而得。阿耨多

羅三藐三菩提。是佛世尊。有金剛智能。破衆生一切惡罪。若言不能。無有是處。大王如來有弟提婆達多。破壞衆僧。出佛身血。害蓮華比丘尼。作三逆罪。如來爲說種種法要。令其重罪。尋得微薄。是故如來爲大良醫。非六師也。大王作一逆者。則便具受。如是一罪。若造二逆罪。則二倍。五逆具者。罪亦五倍。大王我今定知。王之惡業。必不得免。惟願大

王速往佛所除佛世尊餘無能救我今愍汝故相勸導爾時大王聞是語已心懷怖懼舉身戰慄五體掉動如芭蕉樹仰而答曰汝為是誰不現色像而但有聲大王吾是汝父頻婆沙羅汝今當隨耆婆所說莫隨邪見六臣之言時王聞已悶絕躡地身瘡增劇臭穢倍前雖以冷藥塗治療瘡瘡蒸毒熱但增無損

抄已
出上

一 大臣名日月稱
二 藏德
三 有一臣名曰實德
四 有一臣名悉知義
五 大臣名曰吉德
六 無所畏
一 名富闌那
二 名末伽梨拘舍梨子
三 名刪闍耶毗羅胝子
四 名阿嗜多翅舍欽婆羅
五 名迦羅鳩駄迦旃延
六 名尼乾陀若提子
又言善男子如我所言為阿闍世不入涅槃如是密義汝未能解何以故我言為者一切

凡夫阿闍世者普及一切造五逆者又復爲者卽是一切有爲衆生我終不爲無爲衆生而住於世何以故夫無爲者非衆生也阿闍世者卽是具足煩惱等者又復爲者卽是不見佛性衆生若見佛性我終不爲久住於世何以故見佛性者非衆生也阿闍世者卽是一切未發阿耨多羅三藐三菩提心者至乃又復爲者名爲佛性阿闍者名爲不生世者名

怨以不生佛性故則煩惱怨生煩惱怨生故不見佛性以不生煩惱故則見佛性以見佛性故則得安住大般涅槃是名不生是故名爲阿闍世善男子阿闍者名不生不生者名涅槃世名世法爲者名不汗以世八法所不汗故無量無邊阿僧祇劫不入涅槃是故我言爲阿闍世無量億劫不入涅槃善男子如來密語不可思議佛法衆僧亦不可思議菩

薩摩訶薩亦不可思議大涅槃經亦不可思議爾時世尊大悲導師爲阿闍世王入月愛三昧入三昧已放大光明其光清涼往照王身身瘡卽癒至乃王言耆婆彼天中天以何因緣放斯光明大王今是瑞相相似爲及以王先言世無良醫療治身心故放此光先治王身然後及心王言耆婆如來世尊亦見念耶耆婆答言譬如一人而有七子是七子中遇

病父母之心非不平等然於病子心則偏重大王如來亦爾於諸衆生非不平等然於罪者心則偏重於放逸者佛則慈念不放逸者心則放捨何等名爲不放逸者謂六住菩薩大王諸佛世尊於諸衆生不觀種姓老少中年貧富時節日月星宿工巧下賤僮僕婢使唯觀衆生有善心者若有善心則便慈念大王當知如是瑞相卽是如來入月愛三昧所

放光明王卽問言何等名爲月愛三昧耆婆
答言譬如月光能令一切優鉢羅華開敷鮮
明月愛三昧亦復如是能令衆生善心開敷
是故名爲月愛三昧大王譬如月光能令一
切行路之人心生歡喜月愛三昧亦復如是
能令修習涅槃道者心生歡喜是故復名月
愛三昧至乃諸善中王爲甘露味一切衆生之
所愛樂是故復名月愛三昧至乃爾時佛告諸

大衆言一切衆生爲阿耨多羅三藐三菩提
近因緣者無先善友何以故阿闍世王若不
隨順耆婆語者來月七日必定命終墮阿鼻
獄是故近因莫若善友阿闍世王復於前路
聞舍婆提毗瑠璃王乘船入海遇火而死瞿
伽離比丘生身入地至阿鼻獄須那刹多作
種種惡到於佛所衆罪得滅聞是語已語耆
婆言吾今雖聞如是二語猶未審定汝來耆

婆吾欲與汝同載一象設我當入阿鼻地獄
冀汝捉持不令我墮何以故吾昔曾聞得道
之人不入地獄至乃云何說言定入地獄大王
一切衆生所作罪業凡有二種一者輕二者
重若心口作則名爲輕身口心作則名爲重
大王心念口說身不作者所得報輕大王昔
日口不勅殺但言削足大王若勅侍臣立斬
王首坐時乃斬猶不得罪况王不勅云何得

罪王若得罪諸佛世尊亦應得罪何以故汝
父先王頻婆沙羅常於諸佛種諸善根是故
今日得居王位諸佛若不受其供養則不爲
王若不爲王汝則不得爲國生害若汝殺父
當有罪者我等諸佛亦應有罪若諸佛世尊
無得罪者汝獨云何而得罪耶大王頻婆沙
羅往有惡心於毘富羅山遊行射獵周徧曠
野悉無所得唯見一仙五通具足見已卽生

瞋恚惡心。我今遊獵。所以不得正坐。此人駢逐。令去。卽勅左右。而令殺之。其人臨終。生瞋惡心。退失神通。而作誓言。我實無辜。汝以心口橫加戮害。我於來世。亦當如是。還以心口而害於汝時。王聞已。卽生悔心。供養死屍。先王如是。尙得輕受。不墮地獄。况王不爾。而當地獄受果報耶。先王自作。還自受之。云何令王而得殺罪。如王所言。父王無辜者。大王云。

何言無夫。有罪者。則有罪報。無惡業者。則無罪報。汝父先王若無辜罪。云何有報。頻婆沙羅於現世中。亦得善果。及以惡果。是故先王亦復不定。以不定。故殺亦不定。殺不定。故云何而言定。入地獄。大王衆生。狂惑。凡有四種。一者貪狂。二者藥狂。三者呪狂。四者本業緣狂。大王我弟子中。有是四狂。雖多作惡。我終不記。是人犯戒。是人所作。不至三惡。若還得。

心亦不言犯王本貪國逆害父王貪狂心作
云何得罪大王如人耽醉逆害其母既醒悟
已心生悔恨當知是業亦不得報王今貪醉
非本心作若非本心云何得罪大王譬如幻
師四衢道頭幻作種種男女象馬瓔珞衣服
愚癡之人謂爲真實有智之人知非真有殺
亦如是凡夫謂實諸佛世尊知其非真大王
譬如山谷響聲愚癡之人謂之實聲有智之

人知其非真殺亦如是凡夫謂實諸佛世尊
知其非真大王如人有怨詐來親附愚癡之
人謂爲真實智者了達乃知虛詐殺亦如是
凡夫謂實諸佛世尊知其非真大王如人執
鏡自見面像愚癡之人謂爲真面智者了達
知其非真殺亦如是凡夫謂實諸佛世尊知
其非真大王如熱時炎愚癡之人謂之是水
智者了達知其非水殺亦如是凡夫謂實諸

佛世尊知其非真大王如乾闥婆城愚癡之人謂爲真實智者了達知其非真殺亦如是凡夫爲實諸佛世尊知其非真大王如人夢中受五欲樂愚癡之人謂之爲實智者了達知其非真殺亦如是凡夫謂實諸佛世尊知其非真大王殺法殺業殺者殺果及以解脫我皆了之則無有罪王雖知殺云何有罪大王譬如有人主知典酒如其不飲則亦不醉

雖復知火亦不燒燃王亦如是雖復知殺云何有罪大王有諸衆生於日出時作種種罪於日出時復行劫盜日月不出則不作罪雖因日月令其作罪然此日月實不得罪殺亦如是至乃大王譬如涅槃非有非無而亦是有殺亦如是雖非有非無而亦是有慙愧之人則爲非有無慙愧者則爲非無受果報者名之爲有空見之人則爲非有有見之人則爲

非無有有見者亦名爲有何以故有有見者
 得果報故無有見者則無果報常見之人則
 爲非有無常見者則爲非無常常見者不得
 爲無何以故常常見者有惡業果故是故常
 常見者不得爲無以是義故雖非有非無而
 亦是有大王夫衆生者名出入息斷出入息
 故名爲殺諸佛隨俗亦說爲殺至乃世尊我見
 世間從伊蘭子生伊蘭樹不見伊蘭生梅檀

樹我今始見從伊蘭子生梅檀樹伊蘭子者
 我身是也梅檀樹者卽是我心無根信也無
 根者我初不知恭敬如來不信法僧是名無
 根世尊我若不遇如來世尊當於無量阿僧
 祇劫在大地獄受無量苦我今見佛以是見
 佛所得功德破壞衆生煩惱惡心佛言大王
 善哉善哉我今知汝必能破壞衆生惡心世
 尊若我審能破壞衆生諸惡心者使我常在

阿鼻地獄無量劫中爲諸衆生受大苦惱不以爲苦爾時摩伽陀國無量人民悉發阿耨多羅三藐三菩提心以如是等無量人民發大心故阿闍世王所有重罪卽得微薄王及夫人後宮采女悉皆同發阿耨多羅三藐三菩提心爾時阿闍世王語耆婆言耆婆我今未死已得天身捨於短命而得長命捨無常身而得常身令諸衆生發阿耨多羅三藐三

菩提心至乃諸佛弟子說是語已卽以種種寶幢至乃復以偈頌而讚嘆言實語甚微妙善巧於句義甚深秘密藏爲衆故顯示所有廣博言爲衆故略說具足如是語善能療衆生若有諸衆生得聞是語者若信及不信定知是佛說諸佛常輒語爲衆故說麤麤語及輒語皆歸第一義是故我今者歸依於世尊

如來語一味 猶如大海水 是名第一諦
故無無義語 如來今所說 種種無量法
男女大小聞 同獲第一義 無因亦無果
無生亦無滅 是名大涅槃 聞者破諸果
如來爲一切 常作慈父母 當知諸衆生
皆是如來子 世尊大慈悲 爲衆故苦行
如人著鬼魅 狂亂多所爲 我今得見佛
所得三業善 願以此功德 廻向無上道

我今所供養 佛法及衆僧 願以此功德
三寶常在世 我今所當獲 種種諸功德
願以此破壞 衆生四種魔 我遇惡知識
造作三世罪 今於佛前悔 願後更莫造
願諸衆生等 悉發菩提心 繫心常思念
十方一切佛 復願諸衆生 永破諸煩惱
了了見佛性 猶如妙德等
爾時世尊讚阿闍世王善哉善哉若有人能

發菩提心當知是人則爲莊嚴諸佛大衆大王汝昔已於毗婆尸佛初發阿耨多羅三藐三菩提心從是已來至我出世於其中間未曾復墮於地獄受苦大王當知菩提之心乃有如是無量果報大王從今已往常當勤修菩提之心何以故從是因緣當得消滅無量惡故爾時阿闍世王及摩伽陀舉國人民從座而起繞佛三匝辭退還宮抄上又言善男

子羅閱祇王頻婆沙羅其王太子名曰善見業因緣故生惡逆心欲害其父而不得便爾時惡人提婆達多亦因過去業因緣故復於我所生不善心欲害於我卽修五通不久獲得與善見太子共爲親厚爲太子故現作種種神通之事從非門出從門而入從門而出非門而入或時示現象馬牛羊男女之身善見太子見已卽生愛心喜心敬信之心爲是

事。故。嚴。設。種。種。供。養。之。具。而。供。養。之。又。復。白。
言。大。師。聖。人。我。今。欲。見。曼。陀。羅。華。時。提。婆。達。
多。卽。便。往。至。三。十。三。天。從。彼。天。人。而。求。索。之。
其。福。盡。故。都。無。與。者。既。不。得。花。作。是。思。惟。曼。
陀。羅。樹。無。我。我。所。我。若。自。取。當。有。何。罪。卽。前。
欲。取。便。失。神。通。還。見。已。身。在。王。舍。城。心。生。慚。
愧。不。能。復。見。善。見。太。子。復。作。是。念。我。今。當。往。
至。如。來。所。求。索。大。衆。佛。若。聽。者。我。當。隨。意。教。

詔。勅。使。舍。利。弗。等。爾。時。提。婆。達。多。便。來。我。所。
作。如。是。言。唯。願。如。來。以。此。大。衆。付。囑。於。我。我。
當。種。種。說。法。教。化。令。其。調。伏。我。言。癡。人。舍。利。
弗。等。聰。明。大。智。世。所。信。伏。我。猶。不。以。大。衆。付。
囑。況。汝。癡。人。食。唾。者。乎。時。提。婆。達。多。復。於。我。
所。倍。生。惡。心。作。如。是。言。瞿。曇。汝。今。雖。復。調。伏。
大。衆。勢。亦。不。久。當。見。磨。滅。作。是。語。已。大。地。卽。
時。六。反。震。動。提。婆。達。多。尋。時。躡。地。於。其。身。邊。

出大暴風吹諸塵土而汚至之提婆達多見惡相已復作是言若我此身現世必入阿鼻地獄我要當報如是大怨時提婆達多尋起往至善見太子所善見見已卽問聖人何故顏容憔悴有憂色耶提婆達多言我常如是汝不知乎善見答曰願說其意何因緣爾提婆達多言我今與汝極成親愛外人罵汝以爲非理我聞是事豈得不憂善見太子復作

是言國人云何罵辱於我提婆達言國人罵汝爲未生怨善見復言何故名我爲未生怨誰作此名提婆達言汝未生時一切相師皆作是言是兒生已當殺其父是故外人皆悉號汝爲未生怨一切內人護汝心故謂爲善見毘提夫人聞是語已旣生汝身於高樓上棄之於地壞汝一指以是因緣人復號汝爲婆羅留枝我聞是已心生愁憤而復不能向

汝說之提婆達多以如是等種種惡事教令殺父若汝父死我亦能殺瞿曇沙門善見太子問一大臣名曰雨行大王何故爲我立字作未生怨大臣卽爲說其本末如提婆達所說無異善見聞已卽與大臣收其父王閉之城外以四種兵而守衛之毘提夫人聞是事已卽至王所時守王人遮不聽入爾時夫人生瞋恚心便呵罵之時諸守人卽告太子大

王夫人欲見父王不審聽不善見聞已復生瞋嫌卽往母所前牽母髮拔刀欲斫爾時耆婆白言大王有國已來罪雖極重不及女人况所生母善見太子聞是語已爲耆婆故卽便放捨遮斷大王衣服臥具飲食湯藥過七日已王命便終善見太子見父喪已方生悔心雨行大臣復以種種惡邪之法而爲說之大王一切業行都無有罪何故今者而生悔

心者婆復言大王當知如是業者罪兼二重一者殺害父王二者殺須陀洹如是罪者除佛更無能除滅者善見王言如來清淨無有穢濁我等罪人云何得見善男子我知是事故告阿難過三月已吾當涅槃善見聞已卽來我所我爲說法重罪得薄獲無根信善男子我諸弟子聞是說已不解我意故作是言如來定說畢竟涅槃善男子菩薩二種一者

實義二者假名假名菩薩聞我三月當入涅槃皆生退心而作是言如其如來無常不住我等何爲爲是事故無量世中受大苦惱如來世尊成就具足無量功德尙不能壞如是死魔况我等輩當能壞耶善男子是故我爲如是菩薩而作是言如來常住無有變易我諸弟子聞是說已不解我意定言如來終不畢竟入於涅槃抄上是以今據大聖眞說難

化三機難治三病者憑大悲弘誓歸利他信
 海矜哀斯治憐憫斯療喻如醍醐妙藥療一
 切病濁世庶類穢惡群生應求念金剛不壞
 真心可執持本願醍醐妙藥也應知
 夫據諸大乘說難化機今大經言唯除五逆
 誹謗正法或言唯除造無間惡業誹謗正法
 及諸聖人觀經明五逆往生不說謗法涅槃
 經說難治機與病斯等真教云何思量耶報

導論註云問曰無量壽經言願往生者皆得
 往生唯除五逆誹謗正法觀無量壽經言五
 逆十惡具諸不善亦得往生此二經云何會
 答曰一經以具二種重罪一者五逆二者誹
 謗正法以此二種罪故所以不得往生一經
 但言作十惡五逆等罪不言誹謗正法以不
 謗正法故是故得生問曰假使一人具五逆
 罪而不誹謗正法經許得生復有一人但誹

誹正法而無五逆諸罪願往生者得生以不
答曰但令誹謗正法雖更無餘罪必不得生
何以言之經言五逆罪人墮阿鼻大地獄中
具受一劫重罪誹謗正法人墮阿鼻大地獄
中此劫若盡復轉至他方阿鼻大地獄中如
是展轉逕百千阿鼻大地獄佛不記得出時
節以誹謗正法罪極重故又正法者卽是佛
法此愚癡人既生誹謗安有願生佛土之理

假使但貪彼生安樂而願生者亦如求非水
之冰無烟之火豈有得理問曰何等相是誹
謗正法答曰若言無佛無佛法無菩薩無菩
薩法如是等見若心自解若從他受其心決
定皆名誹謗正法問曰如是等計但是已事
於衆生有何苦惱踰於五逆重罪耶答曰若
無諸佛菩薩說世間出世間善道教化衆生
者豈知有仁義禮智信耶如是世間一切善

法皆斷出世間一切賢聖皆滅汝但知五逆罪為重而不知五逆罪從無正法生是故謗正法人其罪最重問曰業道經言業道如秤重者先牽如觀無量壽經言有人造五逆十惡具諸不善應墮惡道逕歷多劫受無量苦臨命終時遇善知識教稱南無無量壽佛如是至心令聲不絕具足十念便得往生安樂淨土即入大乘正定之聚畢竟不退與三塗

諸苦永隔先牽之義於理如何又曠劫已來備造諸行有漏之法繫屬三界但以十念念阿彌陀佛便出三界繫業之義復欲云何答曰汝謂五逆十惡繫業等為重以下品人十念為輕應為罪所牽先墮地獄繫在三界者今當以義校量輕重之義在心在緣在決定不在時節久近多少也云何在心彼造罪人自依止虛妄顛倒見生此十念者依善知

識方便安慰聞實相法生一實一虛豈得相
比譬如千歲闍室光若暫至即便明朗闍豈
得言在室千歲而不去耶是名在心云何在
緣彼造罪人自依止妄想心依煩惱虛妄果
報衆生生此十念者依止無上信心依阿彌
陀如來方便莊嚴眞實清淨無量功德名號
生譬如有人被毒箭所中截筋破骨聞滅除
藥鼓卽箭出毒除

首楞嚴經言譬如有人藥名曰滅除若聞戰
時用以塗鼓聞鼓聲者箭出毒除菩薩摩

阿羅亦復如是住首楞嚴三昧
聞其名者三毒之箭自然拔出

豈可得言彼箭深毒厲
聞鼓音聲不能拔箭去毒耶是名在緣云何
在決定彼造罪人依止有後心有間心生此
十念者依止無後心無間心生是名決定校
量三義十念者重重者先牽能出三有兩經
一義耳問曰幾時名爲一念答曰百一生滅
名一刹那六十刹那名爲一念此中云念者
不取此時節也但言憶念阿彌陀佛若總相

若別相隨所觀緣心無他想十念相續名爲十念但稱名號亦復如是問曰心若他緣攝之令還可知念之多少但知多少復非無間若凝心注想復依何可得記念之多少答曰經言十念者明業事成辨耳不必須知頭數也如言螻蛄不識春秋伊蟲豈知朱陽之節乎知者言之耳十念業成者是亦通神者言之耳但積念相續不緣他事便罷復何假須

知念之頭數也若必須知亦有方便必須口授不得題之筆點上巳光明寺和尚云問曰如四十八願中唯除五逆誹謗正法不得往生今此觀經下品下生中簡誹謗攝五逆者有何意也答曰此義仰就抑止門中解如四十八願中除謗法五逆者然此之二業其障極重衆生若造直入阿鼻歷劫周章無由可出但如來恐其造斯二過方便止言不得往生

亦不是不攝也。又下品下生中取五逆除謗法者。其五逆已作不可捨。令流轉還發大悲。攝取往生。然謗法之罪未爲。又止言若起謗法。卽不得生。此就未造業而解也。若造還攝得生。雖得生。彼華合逕於多劫。此等罪人在華內時有三種障。一者不得見佛及諸聖衆。二者不得聽聞正法。三者不得歷事供養。除此已外更無諸苦。經云猶如比丘入三禪之

樂也。應知雖在華中多劫不開。可不勝阿鼻地獄之中。長時永劫受諸苦痛也。此義就抑止門解竟。又云永絕譏嫌等無憂惱。人天善惡皆得往。到彼無殊齊。同不退。何意然者。乃由彌陀因地世饒王佛所捨位出家。卽起悲智之心。廣弘四十八願。以佛願力。五逆之與十惡罪滅得生。謗法闍提迴心皆往。言五逆者。若依淄州五逆有二。一者三乘五逆。

謂一者故思殺父二者故思殺母三者故思殺羅漢四者倒見破和合僧五者惡心出佛身血以背恩田違福田故名之為逆執此逆者身壞命終必定墮無間地獄一大劫中受無間苦名無間業又俱舍論中有五無間同類業彼頌云汗母無學尼殺母罪同類殺住定菩薩殺父罪同類及有學無學殺羅漢同類奪僧和合緣破僧罪同類破壞率都婆出佛身血二者大乘五逆如薩遮尼乾

子經說一者破壞塔焚燒經藏及以盜用三寶財物二者謗三乘法言非聖教障破留難隱蔽覆藏三者一切出家人若戒無戒破戒打罵呵責說過禁閉還俗駢使債調斷命四者殺父害母出佛身血破和合僧殺阿羅漢五者謗無因果長夜常行十不善業上彼經云一起不善心殺害獨覺是殺生二媯羅漢尼是云邪行也三侵損所施三寶物是不與

255
518

取四倒見破和合僧衆是虛誑語也
出略

顯淨土真實信文類三

